

Cuba curi dompet wanita, lelaki warga asing dipenjara enam bulan

SIBU: Seorang lelaki warga asing dikenakan hukuman penjara enam bulan oleh Mahkamah Majistret di sini semalam atas pertuduhan cuba mencuri dompet seorang wanita, 18 Mei lepas.

Majistret Oon Kork Chern yang mendengar kes, memerintahkan tertuduh Rashid Tahir, 57, menjalani hukuman penjara itu berkuat kuasa dari tarikh hukuman dijatuhkan.

Mengikut pertuduhan, Rashid didakwa cuba mencuri dompet milik seorang wanita Cina di Jalan Bengkel pada 18 Mei 2024, kira-kira jam 9.45 pagi dan telah melakukan kesalahan di bawah Seksyen 379 yang dibaca bersama Seksyen 511 Kanun Keseksaan.

Sabit kesalahan boleh dikenakan hukuman penjara sehingga tujuh tahun atau denda atau kedua-duanya dan bagi kesalahan kedua dan seterusnya, boleh dikenakan hukuman penjara dan juga denda atau sebatan.

Berdasarkan fakta kes, pada hari kejadian, pengadu yang bekerja di sebuah kedai di Jalan Bengkel terlihat seorang lelaki cuba mencuri dompet seorang pelanggan wanita yang sedang membuat pembayaran di kaunter.

Sebelum lelaki terbabit yang juga tertuduh dapat mencuri dompet terbabit, rakan sekerja pengadu menjerit serta menangkapnya sebelum meny-

erahkan tertuduh kepada pihak polis.

Pihak polis turut merampas beg berwarna hitam, jaket kelabu, jam tangan, dompet hitam, wang tunai RM110, telefon bimbit, topi, kasut, baju, kad pengenalan serta pasport milik tertuduh.

Rakaman kamera liter tertutup (CCTV) pada hari kejadian juga menunjukkan tertuduh cuba mencuri dompet milik mangsa dengan dibantu oleh dua lelaki lain yang masih bebas.

Dalam kes berasingan di mahkamah sama, Rashid juga dikenakan hukuman denda RM2,000 atau penjara sebulan setelah mengaku bersalah atas pertuduhan mencuri dompet milik seorang lagi wanita.

Dia didakwa melakukan kesalahan itu pada 11 Mei 2024, kira-kira jam 8.30 pagi di sebuah kedai menjual buah di Jalan Bengkel dan didakwa mengikut Seksyen 379 Kanun Keseksaan.

Fakta kes menyatakan pada hari kejadian, pengadu mendapati dompet yang disimpan di dalam beg telah hilang dipercayai dicuri. Mangsa kehilangan dompet berwarna hitam, kad pengenalan, dua kad ATM dan wang tunai RM300.

Pada 28 Mei 2024, kira-kira jam 10.10 pagi, bertempat di tepi Jalan Keruing, pihak polis telah menahan tertuduh.